

nere, negotio, magistratu obeundo non aliquando in leges quidpiam committitur? In humanis rebus quam invenias, quæ æquabili tenore, atque eodem cursu semper feratur? Cur novæ leges, mandata, instituta, abrogationes, sanctiones; si nunquam ab itinere deflectitur? si semper publicis decretis obtemperamus? si statutos a prudentibus limites non egredimur? Nolo mordicus tueri, in tot Decemvirum, Adscriptorumque decretis fortasse aliqua inveniri non posse (licet pauca ea sint) quæ aliqua in re castiganda & corrigenda sint. Concedo, quandoque non omnes leges in consilium adhibitis fuisse. Addo etiam, adversus leges nonnunquam factum. Nunquid ob id in magistratum invehi? nunquid instituta corrumpere oportet, quibus per tot annos publicæ res administratæ sunt? An ea, quæ majores nostri summa ratione instituere, quæ toties sunt experti, ingens vestra prudentia delebit? vestra inquam prudentia, qui hoc imperium ab iis accepistis, qui singularem sapientiam, eximiamque eorum in patriam charitatem ad vivum exprimitis? Cur, si quid humani irrepit, non tollimus? cur, si qua in re peccatum est, non corrigimus? cur legem a Consiliariis latam non ferimus? Qua ne minima quidem ex parte Senatus auctoritati ac majestati derogant, sed ea illibata atque intacta præclari hujusce regiminis fundamenta concilii, quod semper in Republica gravissimum habitum est, auctoritatem tueri ac confirmare nituntur. Quis enim inficias iverit, ac non invitus quoque fateri cogatur, sæpius ex ejus consultationibus ac decretis immensa prope commoda, quæ vix fando enumerari queant, ad Rempublicam manasse? Quæ ut multa sint, unum pro cunctis in omnem posteritatem fama propagabit, pacem nempe cum Selymo Turcarum Rege nuper sancitam, qua effectum est, ut jactata procellis, sævaque tempestate quassata Respublica, tandem incolumis portum subiverit; cum antea triennii bello confecta, ab amicis deserta, veluti navis, discissis velis, disruptis antemnis, confracto malo, remigio nudata, præsens naufragium expectaret. Quis neget hoc uno facile patefactum, quantum Reipublicæ intersit, duabus hisce veluti an-